

**Waraga më acël na Paulo öcöö
both jö Korinti
1 Jö Korinti
Köp na tye i waraga ka Paulo
më acël both jö Korinti**

Waraga më acël na Paulo öcöö both jö Korinti onwongo ëcöö më tyeko pëkö më kwö k'Ekiricito ëka kî yee n'onen kî both jö n'oye Kiricito na Paulo öcakö i Korinti. I karë nön Korinti onwongo obedo pacö na dit ka jö Girik n'öcökö kwa kaka na papath na bedo ië, obedo pacö na dit më Roma na tye i Akaya. Korinti onwongo engeo rwök i kite më cadhö wil, awaka më thëkwarö, tic më ölyang n'önya rwök, ëka kî kwa dini na pol.

Köp k'akwëna Paulo na pîrë tøk onwongo tye i kom pëkö na calö apokapoka, tîm më ölyang i kin jö n'oye Kiricito, peny i kom miti më kom ëka nyom. Köp më kwö n'opore, kite na jö n'oye Kiricito myero obed gîni ködë, mîc më Tipo Naleng ëka köp më cer. Kî neno na thwönë, Paulo onyutho kit n'Emuth na Bër twak ködë i kom pëkö ni gîni.

Cura 13, na nyutho mar na calö mîc k'Obanga na pîrë tøk na ën mîö both jögë, obedo köp na ngere rwök i buk ni.

Moth n'öya kî both Paulo

¹ Waraga ni öya kî both Paulo n'ëyërö kî miti k'Obanga më bedo akwëna ka Kiricito Yecu, ëka kî both ömîn onu Coctene.

² Wan etye ka cöönö both jö k'Obanga n'oye Kiricito na tye i Korinti, bothwu jö n'Obanga otyeko lönyöwu i Kiricito Yecu, ëka ocwodowu më bedo jögë na leng, kanya acël ki jö na tye i kabedo kibëc na cwodo nyïng Rwoth onu Yecu Kiricito n'obedo Rwothgi ëka më onu.

³ Ëk Obanga Apap onu ëka Rwoth Yecu Kiricito ömïïwu gum ëka kuc.

Paulo ömïö pwöc both Obanga

⁴ Karë kibëc an amïö pwöc both Obangana pi kïca mërë na ën ömïöwu i Kiricito Yecu.

⁵ Pi bedowu i Kiricito idökö unu ëlönyö dong i yodhi kibëc. Itye unu dong ki ngec ëka kite më twak kibëc na bër,

⁶ piën köp na wan epwonyo i kom Kiricito ödönyö na thuth i cwinywu.

⁷ Kobedi dong un itye ki mic kibëc më Tipo na un imitö na calö itye ka kürö unu karë më nyutho Rwoth onu Yecu Kiricito.

⁸ Ën bino mïöwu icung na tük naka i ajiki ëk gin mörö obed n'ope n'edothowu ködë i nïnö na Rwothwa Yecu Kiricito bino dwogo.

⁹ Obanga, n'ocwodowu më güre më ribërë kanya acël ki Wode Yecu Kiricito Rwoth onu, obedo Obanga na genere.

Apokapoka n'obedo i kin jö n'oye Kiricito

¹⁰ Abakö dhöga bothwu utmegona, ki nyïng Rwoth onu Yecu Kiricito, nï un kibëc myero iyere unu kenwu i köp acël ëk kür imïï unu apokapoka obed tye i kinwu ëntö nöthërë unu i cwiny ëka thama acël.

¹¹ Utmegona, jö mökö n'öya kī ī pacō ka Koloe okobo gīnī botha nī dha tye ī kinwu.

¹² Gin na an atye ka kobo ene: Jö mökö kī kinwu tye ka kobo nī, “An abedo dhanö ka Paulo.” Jö nököne kobo nī, “An abedo dhanö k'Apolo,” onyo nī, “An abedo dhanö ka Kepa,*” onyo nī, “An abedo dhanö ka Kiricito.”

¹³ Kiricito opokere? Onwongo Paulo eguro ī kor yath ariā pīrwu? Ngat mörö tye ī kinwu n'ebatica kī nyīng Paulo?

¹⁴ An apwöyö Obanga piēn yam an ba abatica ngat mörö kī kinwu na path kī Kiricipac ēka Gayo,

¹⁵ ēk ngat mörö kür okob nī ebatica ēn kī nyīnga.

¹⁶ (Eyo, an thon abatica jö mē pacō ka Citipwanu, ēntö an ba apo nī abatica ngat mörö nököne.)

¹⁷ Piēn Kiricito ba oora mē batica jīl, ēntö mē titö köp mē Emuth na Bēr, ēka pathī kī ryökö ka dhanö, ēk kür ömīl thöo ka Kiricito ī kor yath ariā obed gin na köny mērē ope.

Kiricito ēnē Tökö ēka Ryökö k'Obanga

¹⁸ Köp ī kom yath ariā obedo köp mē mingo both jö na tye ka rwenyo, ēntö kī both onu jö n'Obanga tye ka larö, obedo tökö k'Obanga.

¹⁹ Ēcöo yam nī,

“Abino balö ryökö ka jö na ryök,
ēka abino kēthö ngec ka jö na ngeo pīny ökö.”

²⁰ Cē dong ēryökö kara ut gīnī kwene? Epwony Cīk ka Muca ut gīnī kwene? Jö na pyem mē karē nī

* **1:12 1:12Kepa** Manön Petero. **1:19 1:19** Icaya 29:14

ut gini kwene? Obanga ba olökö ryekö me lobo ni ödökö me mingo?

²¹ Pi ryekö k'Obanga ömiö jii ba ongeo en ki ryekögi, entö Obanga otio ki köp me mingo na wan etitö me larö jö na yee.

²² Eyuda penyo gini pi anyuth me tango, eka jö Grecia rangö gini ryekö.

²³ Entö ka wan etitö ni Kiricito onwongo eguro i kor yath aria, nwongo obedo gin mörö na rac ki both Eyuda, eka ki both Erok, nwongo obedo köp me mingo.

²⁴ Entö both Eyuda eka Erok n'Obanga ocwodogi me bedo jögë, Kiricito obedo tekö k'Obanga eka ryekö k'Obanga.

²⁵ Gin n'ethamö ni obedo mingo k'Obanga, ryek löö ryekö ka dhanö, eka gin n'ethamö ni obedo görü k'Obanga, tek löö tekö ka dhanö.

²⁶ Utmegona, tham unu i kom kite n'onwongo itye unu ködë i karë n'ecwodowu. Jö na pol ki kinwu onwongo ba ryek gini i kite me lobo ni, polwu onwongo ba obedo wegi twër eka polwu ba obedo wegi dheo.

²⁷ Entö Obanga öyörö jö na jii kobo ni ming gini, me miö lewic both jö na thamö ni gin eryek. Obanga öyörö jö na görü me miö lewic both jö na tek.

²⁸ Obanga öyörö jö mökö me rwöm na piny na jii caö ni könygi ope, naka thon jami mökö n'ope, ek etii ködgi me dwökö piny jami na jii kobo ni pirgi tek,

²⁹ ek ngat mörö kür öwakërë i nyim Obanga.

³⁰ Obanga enë ömiöwu ikwö unu i Kiricito Yecu,

n'ödökö ryëkö onu n'öya kî both Obanga. Pî Kiric-ito, ömïö Obanga ökwanö onu nî kite onu atîr, ömïö onu ebedo jö na leng ëka ögönyö onu kî kom bal.

³¹ Pî manön, kite n'ëcöö ködë î Cöc na Leng nî, “Ngat mörö na mütö wakërë, myero öwakërë î Rwoth.”

2

¹ Î karë na an abino bothwu, utmegona, an ba abino kî ryëkö onyo twak mörö na malö më kobo niwu müng* î kom Obanga.

² Pïën an onwongo ba amütö ngeeno gin mörö î karë na an atye î kinwu, na path kî Yecu Kiricito këkën ëka thöö mërë î kor yath arîa.

³ An abino bothwu na an atye kî görü, kî lworö ëka kî myël kom rwök.

⁴ Twakna ëka titö köpna onwongo ba obedo më ryëkö ëka köp na ywaö thama, ëntö më nyutho tëkö më Tipö,

⁵ ëk yeewu kür ocung î kom ryëkö ka dhanö, ëntö î kom tëkö k'Obanga.

Ryëkö na yaa kî both Obanga

⁶ Wan ëtwakö köp më ryëkö î kin jö n'otengo î cwinygi, ëntö pathî ryëkö më karë nî onyo ryëkö k'ëlöc më karë nî, na gin kikomgi dong tye ka rwenyo ökö.

⁷ Ëntö wan ëtwakö ryëkö k'Obanga më müng, ryëkö n'onwongo ëkanö ökö ëka ryëkö n'Obanga öyübö më kelo nî onu dheo na bara wi lobo öcakërë.

1:31 1:31 Jeremiah 9:24 * 2:12:1 Baibul nökenë kobo nî, “caden.”

⁸ Ba tye ëlöc mörö më karë ni n'önïang ië, kono yam gin önïang, kono ba oguro ginï Rwoth won dheo i kor yath ariä.

⁹ Ëntö kite n'ëcöö ködë nï,
“Gin na wang ba önënö,

ith ba owinyo,
thama ka dhanö ba ögamö
gin n'Obanga öyübö pï jö na marö ën.”

¹⁰ Ëntö Obanga ömïö Tipo Naleng otuco both onu.
Tipo Naleng rangö jami kibëc, naka thon müng k'Obanga na thuth.

¹¹ Nga na ngeo thama ka dhanö nökenë, na path kï cwiny na tye i dhanö nön këkën? I yoo acël nön, dhanö mörö ope na ngeo thama k'Obanga, na path kï Tipo k'Obanga këkën.

¹² Onu ba ëgamö cwiny më lobo, ëntö ëgamö Tipo Naleng n'öya kï both Obanga, ëk ëniang i kom mic n'Obanga ömïö onu nono.

¹³ Man ënë ngö na wan ëtwakö, wan ba ëtwakö köp n'epwonyo kï ryëkö ka dhanö, ëntö köp na Tipo Naleng opwonyowa ködë, nakun pwonyo köp më Tipo n'atir both jö na tye kï Tipo.

¹⁴ Dhanö na ba oye Kiricito, ba twërö gamö ngö na Tipo k'Obanga mïö, piën kï bothe obedo gin mörö më mingo, ëka ën ba twërö niang ië piën koth gin nön ëniang ië kï Tipo.

¹⁵ Dhanö na tye kï Tipo niang jami kibëc, ëntö ën kikome, ngat mörö ope na twërö niang i kome.

¹⁶ Kite na Cöc na Leng kobo nï,
“Nga n'ongeo thama ka Rwoth
ëk opwony ën?”

Ëntö onu etye kî thama ka Kiricito.

3

Apokapoka i kin jö n'oye Kiricito

¹ Utmegona, i karë na an atye bothwu ba atwak kodwu na calö jö na dong tye kî Tipo, ëntö atwak kodwu na calö jö na tye kî kit kwö më lobo, na calö ëthinö na töcö i Kiricito.

² Yam apïdhöwu kî cak, pathi kî cem na tètëk, piën onwongo ba itwëro unu cem, kadî thon kobedini pod bara irömö unu camö cem na tètëk,

³ un pod itye kî kit kwö më lobo. Piën un pod itye k'adïnga i kinwu ëka idhaa unu kenwu, manön ba nyutho nî un pod itye unu kî kit kwö më lobo? Ba pod itye unu ka lübö kite ka dhanö?

⁴ Ka jö mökö kî kinwu kobo nî, “An abedo dhanö ka Paulo,” ëka jö nökenë nî, “An abedo dhanö k'Apolo,” ba nwongo un pod ibedo unu dhanö adhana?

⁵ Kara Apolo ënë nga? Paulo ënë nga? Wan ënë etic n'ömiö iyee unu köp më Emuth na Bër, kite na Rwoth opoko kî tic both ngat acëlacël.

⁶ An apïdhö kodhi, Apolo öönyö pii ië, ëntö Obanga ömiö ödöngö.

⁷ Dong kadî ngat n'öpïdhö onyo ngat n'öönyö pii, gïn kibëc ba obedo gin mörö ëntö Obanga këkën ënë miö jami döngö.

⁸ Dhanö n'öpïdhö ëka dhanö n'öönyö pii, gïn kibëc tio pî gin acël. Ngat acëlacël bino nwongo öcara mërë na röm aröma kî tic na ën otio.

⁹ Piën wan ebledo etic kanya acël k'Obanga, un ibedo unu pwodho k'Obanga, ëka thon ibedo unu gedo k'Obanga.

¹⁰ Pī gum k'Obanga n'ēmīa, ömīö yam an acakö the öt calö agedo n'obedo adirü, dhanö mörö nökenē tye ka gedo i wie. Ēntö dhanö acēlacēl myero ögwökērē i kite na ěn gedo ködē.

¹¹ Pīēn ngat mörö ope na twērö cakö the öt nökenē na path kī man na dong ěcakö, na ěnē Yecu Kiricito.

¹² Ēntö ka ngat mörö ogedo i wi acaki the öt nön kī gol onyo kī ryal, onyo kī kite mē wel, onyo yen, onyo lum agada, onyo lum öcīcī,

¹³ tic ka ngat acēlacēl bino nen ökö kanyalēr, pīēn nīnō mē ngölö köp bino nen kī mac, na bino tēmō tic ka dhanö acēlacēl kite na tye ködē.

¹⁴ Ka gedo ka ngat mörö odong n'ěgērö i kom acaki the öt nön, dhanö nön bino nwongo mīc mē pwöc.

¹⁵ Ēntö ka ngat na tic mērē öwang ökö, ěn ba bino nwongo mīc mörö mē pwöc, ěn kikome bino bwöth, na calö dhanö n'owok i mac awoka cē opoth.

¹⁶ Un ba ingeo nī ibedo unu öt k'Obanga ěka Tipo k'Obanga thon bedo i iwu?

¹⁷ Dong ka ngat mörö öbalö öt k'Obanga, Obanga thon bino balö ěn, pīēn öt k'Obanga leng, un kikomwu ibedo unu öt k'Obanga nön.

¹⁸ Kür iwbölērē unu kenwu. Ka dhanö mörö kī kinwu thamö nī ěn ěryěk kī rwöm mē lobo mē karē nī, myero ěn ödök ngat na mīng, ěk ěn ödök na ryěk.

¹⁹ Pīēn ryěkö mē lobo nī kī i nyim Obanga obedo gin mē mingo. Kite n'ěcöö nī, “Ēn makö jö na ryěk i ököragī mē bwölgī kēn-gī.”

²⁰ Ēka dōkī nī, “Rwoth ngeo nī thama k'ëryëkö köny mërë ope.”

²¹ Dong, ngat mörö myero kür öwakërë i kom dhanö, piën jami kibëc obedo mewu,

²² kadī Paulo, onyo Apolo, onyo Kepa, onyo lobo ni, onyo kwö, onyo thöo, onyo gin mörö na tye, onyo gin mörö na bino bedo i anyim. Manön kibëc obedo mewu,

²³ un thon ibedo më ka Kiricito, ëka Kiricito obedo më k'Obanga.

4

Ēkwëna ka Kiricito

¹ Myero inënwa unu na calö etic ka Kiricito, ëka na calö jö n'ekethogī më gwökö müng k'Obanga.

² Gin na mîtërë kī both ëgwök jami ënë nī gīn myero obed jö na genere.

³ Kī kubotha man köp na tidi mörö ka ingölö unu köp i koma, onyo okiko mörö më ka dhanö. An thon ba angölö köp i koma këna.

⁴ Piën kī kubotha an angeo nī cwinya lër, ëntö man ba mia alöö köp. Rwoth ënë ngölö köpna.

⁵ Pi manön, kür ingöl unu köp mörö na karë bara örömö, na bara Rwoth odwogo. Ēn bino mënyö gin n'opono i piny na cöl, dök bino nyutho tham na tye i cwiny jö kanyalër. I karë nön Obanga bino pwöyö ngat acélacél i kite na mîtërë.

⁶ Utmegona, köp ni bino dwogo i koma këna ëka i kom Apolo pi un, ëk ipwonyere unu i komwa i the köp n'ekobo nī, “Kür ikadh unu ngö n'ëcöo,” ëk ngat

mörö kī kinwu kür öwakërë, nakun pakö dhanö acël ëka caö ngat nökenë.

⁷ Nga n'ömïö in ibedo ngat na path kī jö nökenë? Ngö na in itye ködë na ba emii amïa? Cë ka emii amïa, pïngö iwakiri ködë na calö ba emii amïa?

⁸ Dong ityeko unu yeng ökö! İdökö unu dong ëlönyö! İdökö unu rwodhi abonge wan! Ka onwongo amïtö adyer nï idök unu rwodhi, ëk wan thon ebed rwodhi kanya acël kodwu!

⁹ Pïen kī kubotha nen calö, Obanga onyuthowa wan ëkwëna i nyim lwak kī cen na calö jö n'ëngölö nīgi köp më thöö, pïen wan dong ëdökö gin më anëna both wi lobo thükül, both emalaika ëka both jïi.

¹⁰ Wan ëdökö emingo pïen eyee i kom Kiricito, ëntö un ıryëk unu i Kiricito! Wan ëgörü, ëntö un itëk unu! Eketho wörö i komwu, ëka wan ëcaöwa!

¹¹ Naka i caa ni kec k'orio nekowa, wan eruko opeki, jïi pwodowa, ëka pacöwa thon ope.

¹² Wan etio tic na tëk kī cingwa. Ka jïi lamöwa, wan ëlamö nīgi gum. Ka eyelowa, wan ëdangö adanga.

¹³ Ka ëbalö nyingwa, wan ëgamö kī mwolo. Wan dong ëcal kī yugi më wi lobo, wan ebedo cilo më jami kibëc naka tin.

¹⁴ An ba atye ka cöönö köp ni më miöwu lewic, ëntö më pwonyowu na calö ëthïnöna na an amarö.

¹⁵ Pïen kadï bed nï itye unu kī jö elip apar na tëlöwu i yoo ka Kiricito, un ba itye kī bebe na pol. An yam adökö apapwu i Kiricito Yecu pï köp më Emuth na Bër.

¹⁶ Pï manön an akwaöwu, më poro kitena.

¹⁷ Man enë ngö n'ömïö aoro Timoteo bothwu. Ën obedo athîn na mëga i Rwoth na an amarö, ëka genere. Ën bino po wiwu i yoo na an alübö i Kiricito Yecu, na an apwonyo ki lwak jö n'oye Kiricito na tye i kabedo kibëc.

¹⁸ Jö mökö ki kinwu tye ka thamö ni an ba abino bothwu, ëka ömïö gîn tye ka wakërë.

¹⁹ Ëntö ka Rwoth oyeo, an abino thuno bothwu pïöpïö, cë abino niang i tükö ka jö na wakërë nön, ëntö pathi köp na gîn twakö atwaka.

²⁰ Ker k'Obanga ba obedo twak atwaka ëntö më tükö.

²¹ Ngö na un imitö? Myero abin bothwu ki lüth, onyo abin ki mar ëka ki cwiny më mwolo?

5

Tim më ölyang

¹ Köp owinyere botha adyer ni tim më ölyang tye i kinwu. Tim më ölyang nön ba timërë naka thon i kin jö na ba ngeo Obanga. Dhanö mörö tye n'ömaö apap mërë dhakö.

² Ëka pod iwakërë unu! Ba itwërö unu thon kumo ëk ngat n'ötimö koth tim nön ëryëm ökö ki kinwu?

³ An ki kubotha, kadï koma ope kunön, an atye kodwu i cwiny. An na calö ngat na tye kunön atyeko ngölö köp ökö i kom dhanö n'ötimö tim na rac nön.

⁴ Ka igürë unu i nyïng Rwothwa Yecu, ëka an atye kodwu i cwiny ëka tükö ka Rwothwa Yecu ute,

⁵ miï unu dhanö ni both Catan, ëk onek miti më kwö më anywöli ökö, ëka tipo mërë ölarë i nïnö ka Rwoth.

⁶ Awakawu ba bër. Un ba ingeo nĩ thöbĩ na tidi mörö miö mökö ogati yenyoy?

⁷ Kwany unu thöbĩ na cön ökö, ëk ibed unu ogati na nyen na thöbĩ ope ië na calö itye unu. Piën athĩn römö onu më Poth na ënë Kiricito, ëtyërö dong ökö.

⁸ Pi manön dong, onu myero kür ekwer karama ki thöbĩ na cön, na ënë thöbĩ më rac cwiny ëka tim mökö na reco, ëntö eru ekwer k'ogati na thöbĩ ope ië, na ënë lër ic ëka ki köp adyer.

⁹ Yam acöö niwu i waragana nĩ kür iribërë unu ki jö na timö tim më ölyang.

¹⁰ An onwongo ba akobo jö na timö tim më ölyang më lobo ni, onyo eworo më jami ëka ëyak, onyo ewör cal jwogi. I köp nön un myero iya unu ökö ki i lobo ni.

¹¹ Entö kobedini an acöö bothwu nĩ kür iribërë unu ki dhanö mörö na cwodere nĩ ngat n'oye, ka ën ötimö tim më ölyang onyo ën obedo aworo më jami, onyo awör cal jwök onyo ayany jö, amërö, onyo ayak. Kür thon icem unu ki koth dhanö nön.

¹² Manön ba obedo ticna më ngölö köp both jö na ba ngeo gini Yecu. Pathi un ënë myero ingöl unu köp both jö na tye i kinwu?

¹³ Obanga ënë bino ngölö köp both jö na ba ngeo gini Yecu. “Ryëm unu dhanö na rac ökö ki kinwu.”

6

Pido i kinjö n'oye

¹ Ka dhanö mörö ki kinwu tye ki köp mörö i kom awodhe, pingö lewic ba makö ën më pido dhanö

nön i nyim jö na kitegi ba tye atir nakaka pido dhanö nön i nyim jö k'Obanga na leng?

² Un ba ingeo unu ni jö k'Obanga na leng bino ngölö köp both jö me lobo? Eka ka un ibino ngölö köp both jö me lobo, un ba irömö ngölö köp mökö na thithinö?

³ Un ba ingeo ni onu ebino ngölö köp n'emalaika? Köp na makö kwö na onu etye ie ni kono?

⁴ Kara ka dong itye unu ki köp me alara, pingö itero unu i nyim jö na pirgi ba tek both jö n'oye Kiricito?

⁵ Akobo man ek lewic ömakwu. Ngat mörö na ryek ope i kinwu na twerö tyeko köp na tye i kin jö n'oye?

⁶ Entö nakaka timö ni kömanön, ngat mörö n'oye dök pidere k'ömin märe i nyim jö na ba oye Kiricito.

⁷ Pidere i kinwu kenwu nyutho ni köp ölööwu ökö. Thwara idang unu gin na rac. Thwara iwök unu jii obuwu.

⁸ Nakaka timö ni kömanön, un ki komwu ibuo unu jö eka itimö unu gin na rac, naka i kom utmegowu kikome.

⁹ Un ba ingeo unu ni jö na kitegi ba tye atir, ker k'Obanga ba bino bedo megä? Kür imii ebwölwu, kadä jö na timö tim me ölyang, onyo ewör cal jwogi, onyo jö na dönyö gini i elomi, onyo cwö n'obedo gini jö ölyang, onyo cwö na buto ki cwö ewodhgi,

¹⁰ onyo ekwoe, onyo eworo me jami, onyo emerö, onyo jö na yanyö jii, onyo eyak —ker k'Obanga ba bino bedo megä.

¹¹ Jö mökö ki kinwu yam obedo gini koth jö nön. Entö un dong etyeko lwököwu ökö, etyeko lönyöwu

më bedo jö na leng, etyeko kwanöwu nĩ un jö na kitewu atĩr i nyĩng Rwoth Yecu Kiricito ěka kĩ Tipo k'Obanga onu.

¹² “An atwërö tĩmō jami kībēc,” ěntō ba nyutho nĩ jami kībēc kōnyō. “An atwërö tĩmō jami kībēc,” ěntō ba abino yeo gin mörō më lōkōna më bedo opii mērē.

¹³ “Cem tye pĩ ĩc, ěka ĩc tye pĩ cem.” Ěntō gĩn arĩō nōn kībēc Obanga bino tyekogĩ ōkō. Kom ba obedo më tĩm më ōlyang, ěntō tye pĩ Rwoth, ěka Rwoth tye pĩ kom.

¹⁴ Obanga yam ocero Rwoth kĩ kin jö n'ōthōō, bino cero onu thon kĩ tēkō mērē.

¹⁵ Un ba ingeo unu nĩ komwu obedo dul kom Kiricito? Myero dong akwany dul kom Kiricito alōk ōdōk dul kom ōlaya? Ba twērē!

¹⁶ Onyo ba ingeo unu nĩ dhanō na rībērē kĩ dhanō n'obedo ōlaya dōkō kom acēl kōdē? Pĩen yam ěcōō nĩ, “Gĩn arĩō bino dōkō kom acēl.”

¹⁷ Ěntō dhanō n'ōrībērē kĩ Rwoth dōkō cwiny acēl kōdē.

¹⁸ Rĩng unu ōkō kĩ kom tĩm më ōlyang. Bal nōkēnē kībēc na dhanō tĩmō ba gudo kome, ěntō dhanō na tĩmō tĩm më ōlyang balō kome kēnē.

¹⁹ Un ba ingeo unu nĩ komwu ěnē obedo ōt ka Tipo Naleng na bedo i ĩwu, n'Obanga ōmĩōwu? Un ba ĩbedo unu mewu kenwu.

²⁰ Un ěwĩlōwu awĩla kĩ wel. Pĩ manōn, tii unu kĩ komwu më ketho dheo i kom Obanga.

7

Köp i kom nyom

¹ Kobedini më dök i köp na un icöö waraga ië: Bër ka ëcwö mörö ba obedo ki dhakö.

² Ëntö pi tim më ölyang, ëcwö acëlacël myero obed ki dhakö mërë ëka dhakö acëlacël obed ki cwörë.

³ Ëcwö myero ocob miti ka dhakö mërë, dhakö thon myero ocob miti ka cwörë.

⁴ Dhakö ba tye ki twër i kome kënë, ëntö cwörë ënë tye ki twër i kome, kömanön thon ëcwö ba tye ki twër i kome kënë, ëntö dhakö mërë ënë tye ki twër i kome.

⁵ Kür itwon awodhi komi, kono pi karë mörö na nönök kékën na nwongo iyübö unu ayüba, ëk inwong unu karë më lëga both Obanga. Kinge ribërë unu dök kanya acël, ëk kür Catan ötëmwu, pi mitiwu na ba jükërë.

⁶ An akobo man nakun ayeo ayea, ëntö ba amöö na calö cik.

⁷ Kono twërë, onwongo amitö ni jii kibëc obed calö an. Ëntö dhanö acëlacël tye ki mïc mërë na pirë tèk n'Obanga ömöö, dhanö ni tye ki mïc ni, dhanö nökenë tye ki maca.

⁸ Both jö na bara onyomo ëka mon na cwögi öthöö, akobo ni köman, bër ka gïn obedo na ba onyomo, kite na an atye ködë.

⁹ Ëntö ka gïn ba twërö gwökërë kën-gi, gïn myero onyom, piën nyom bër löö n'ëcwö onyo dhakö më dangö miti më kom.

¹⁰ Both jö na dong onyomo, acikögi ni dhakö kür opokere ki cwörë, (ëntö pathi an ënë acikö, Rwoth ënë öcikö).

¹¹ Ëntö ka dhakö opokere ki cwörë, ën myero obed kür önyömërë, onyo odwog cen both cwörë. Ëka ëcwö myero kür opokere ki dhakö mërë.

¹² Both jö nökenë kibëc (an ënë akobo, pathi Rwoth), ka omego mörö n'oye Kiricito tye ki dhakö mërë na ba oye Kiricito ëka dhakö nön yeo më bedo ködë, ën myero kür ökwër dhakö mërë.

¹³ Ëka ka dhakö mörö tye ki cwörë na ba oye Kiricito ëka ëcwö nön yeo më bedo ködë, ën myero kür ökwër cwörë.

¹⁴ Piën ëcwö na ba oye Kiricito dökö na leng pi dhakö mërë, ëka dhakö na ba oye Kiricito dökö na leng pi cwörë. Ka onwongo ba obedo ni kömanön ëthinöwu ba bedo na leng, ëntö kite na tye ködë, gin dong leng.

¹⁵ Ëntö ka dhanö na ba oye Kiricito mitö pokere k'awodhe, ën twörö pokere. Ëcwö onyo dhakö n'oye Kiricito ope ki dïc ië, piën Obanga ocwodo onu më bedo ki kuc.

¹⁶ In itwörö ngeo ningö, in dhakö, ka ibino larö cworì? Onyo in ingeo ningö, in ëcwö, ka ibino larö dhaköni?

¹⁷ Dong dhanö acëlacël myero ölüb kit kwö na Rwoth ömïö ën, ëka kwö n'Obanga ocwodo ën ië. Man ënë ngö na an acikö both jö kibëc n'oye Kiricito.

¹⁸ Tye ngat mörö n'onwongo ëlirö i karë n'ecwodo ën? Ën kür dök örang yoo më dwökö kome ëk obed calö dhanö na ba ëlirö. Tye ngat mörö n'onwongo ba ëlirö i karë n'ecwodo ën? Ën myero kür ölirë.

¹⁹ Bedo dhanö n'ölirë onyo na ba ölirë obedo gin mörö na köny mërë ope. Gwökö cïk k'Obanga ënë ngö na pirë tük.

²⁰ Dhanö acëlacël myero obed kite n'Obanga onwongo ën i karë n'ecwodo ën ködë.

21 In onwongo ibedo opii i karë n'ecwodi? Kür ibed ki par, ëntö ka itwëro nwongo yoo mörö më yaa ökö ki i opii, tii ködë.

22 Pï ngat n'onwongo obedo opii i karë na Rwoth ocwodo ën, ënë dhanö na Rwoth ögönyö ökö ki i opii. Kömanön thon, dhanö n'onwongo löörë kënë i karë n'ecwodo ën, obedo opii ka Kiricito.

23 Un onwongo ewilöwu ki wel na malö, kür ibed unu opii ka dhanö mörö.

24 Utmegona, dhanö acëlacël myero obed i nyim Obanga i kite na yam ecwodo ën ködë.

Jö na bara onyomo ëka mon thöö

25 Köp na makö jö na bara onyomo, ba atye ki cik mörö n'öya ki both Rwoth, ëntö an amïö thamana ië na calö dhanö n'Obanga ötimö nënë kica ëka ömiö obedo dhanö na genere.

26 Pï can na kobedini ödiöwa, an athamö ni bër ka dhanö mörö obedo kite na ën tye ködë.

27 Ka ibedo dhanö n'onyomo, kür irang yoo më pokere. Eka ka ba inyomo kür irang dhakö më anyöma.

28 Eëntö ka inyomo, nwongo ba itimö bal, ëka ka nyakö mörö na bara ongeö ecwö önyömëre, nwongo ba ötimö bal. Eëntö jö na nyomo bino nwongo ginï pëkö na pol i kwö ni. An amitö ni akwany pëkö ni ökö ki komwu.

29 Utmegona, ngö na an atye ka twakö ënë ni karë dong cwök. Cakërë kobedini cidh ködë anyim, jö na tye ki mon myero obed ginï na calö jö n'ope ki mon.

30 Jö na kumo, myero obed ginï na calö jö na ba tye ka kumo. Jö na cwinygï yom myero obed ginï

na calö jö na igi ba yom. Jö na wilö jami myero obed gini na calö jö n'ope ki gin mörö.

³¹ Jö na tio ki jami me lobo ni myero obed gini na calö jö na ba tye ka tic köde, pien lobo kite na tye köde, bino thum ökö.

³² An amitö ni ibed unu abonge par. Dhanö na bara onyomo, cwinye parö köp ka Rwoth, kite na myero eyom ki cwiny Rwoth köde.

³³ Entö dhanö na dong onyomo ökö, parö pi jami me lobo ni, kite na myero eyom ki cwiny dhakö mere,

³⁴ eka thama mere popoka. Dhakö na bara enyömö onyo nyakö na bara ongec ewö mörö, parö köp ka Rwoth ek ebed na leng i kome eka i cwinye. Entö dhakö na dong enyömö parö pi köp me lobo ni, kite na myero eyom ki cwiny cwöre köde.

³⁵ An akobo köp ni pi könyöwu, pathi me jüköwu, entö me mio jami kibec owoth kakare, cwinywu thon obed i kom Rwoth na gin mörö ope na lökö thamawu thenge.

³⁶ Ka ngat mörö thamö ni kite me bedo mere ki nyakö na en ecikere köde me nyömö ba tye na ber, eka mwaka ka nyakö non tye ka bedo na thwöne, eka en thamö ni myero enyöm, en myero otim kite na en mitö köde. En nwongo ba tye ka timö bal. Gin myero onyom.

³⁷ Entö ka dhanö mörö cwinye tek na gin mörö ope na dio en, na dong otyeko thon yeo me weko nyakö non na bara enyömö, en nwongo otimö gin na ber.

³⁸ Kömanön thon, dhanö n'onyömö nyakö na en ocikere köde nwongo otimö ber, entö dhanö na ba

önyömö nyakö na ën öcükërë ködë nwongo ötümö bër rwök.

³⁹ Cìk gëngö dhakö më pokere kî cwörë ka pod kwö, ëntö ka cwörë öthöö ökö, ën dong twërö nyömërë k'ëcwö mörö kèkën na ën mitö, ëntö ëcwö nön myero obed dhanö na tye i Rwoth.

⁴⁰ Ëntö kî thamana ën bino bedo kî yom cwiny ka obedo kënë, ëka an athamö nî atye ka mïö ngö na yaa kî i Tipo k'Obanga ka atye ka kobo köp nî.

8

Cem n'ëtyërö both cal jwogi

¹ Köp na makö cem n'ëtyërö both cal jwogi, eyo onu engeo nî “onu kîbëc etye kî ngec.” Koth ngec nön mïö onu ebedo k'awaka ëntö mar ënë mïö onu ecung na tæk.

² Ka dhanö mörö thamö nî engeo gin mörö, nwongo ba ngeo gin mörö kite n'onwongo myero ën onge ködë.

³ Ëntö ka ngat mörö marö Obanga, Obanga thon ngeo ën.

⁴ Cë dong köp i kom camö cem n'ëtyërö both cal jwogi, onu engeo nî cal jwök ba obedo gin mörö na tye i lobo, ëka dökî nî obanga nökenë ope na path k'Obanga acël kèkën.

⁵ Kadî bed nî gin mökö tye n'ecwodo nî obanga i wi polo onyo i wi lobo, tye “obanga” na pol ëka “rwodhi” na pol,

⁶ ëntö onu etye k'Obanga acël, na ënë Apap, na jami kîbëc yaa kî bothe, na onu ëkwö pî ën, ëka Rwoth tye acël, Yecu Kiricito, na jami kîbëc öya kî bothe ëka onu ëkwö pî ën.

⁷ Kadī bed nī kömanön, jö kibēc ba tye kī ngec nön. Jö nökenē tye na dong önaa ökö kī cal jwogi naka tin, gīn cemo nakun nwongo pod thamö gīnī nī man cem n'ëtyërö both cal jwogi, ëka miö thama na görü na tye i cwinygī na nyuthigī balgī bal ökö.

⁸ Ëntö cem ba bino miö onu bedo na cwök k'Obanga. Onu ba ebino bedo na rac ka ba ecemo, ëka thon ba ebino bedo na bër ka ecemo.

⁹ Gwökërë unu, ëk twërö nī ut unu ködë kür ödök gin mörö na miö jö na görü podho gīnī i bal.

¹⁰ Pīen ka dhanö mörö na tye kī thama na görü i cwinye oneni ka in itye ka cem i öt cal jwök nakun in itye kī ngec, ba bino mädö nīnē tēk cwiny mē camö cem n'ëtyërö both cal jwogi?

¹¹ Ëka dong omeru ni na görü na yam Kiricito öthöo pīrē, ën bino thöo pī ngec na megī.

¹² Ka ibalö unu both utmegowu na yeegī görü, ëka iwanö unu thama mē cwinygī na pod görü, nwongo ibalö unu i kom Kiricito.

¹³ Pī manön ka cem miö ömëra podho ökö i bal, cē ba abino camö ringo dōkī ëk kür amīi ömëra opodh i bal.

9

Twërö k'Akwëna

¹ An ba alööra këna? An ba abedo akwëna? An yam ba anënö Rwoth onu Yecu? Un ba ibedo unu adwogi mē ticna i Rwoth?

² Ka jö mökö ba yeo nī an abedo akwëna, ëntö kī kubothwu an abedo akwëna, pīen un kikomwu ibedo unu anyuth nī an abedo akwëna ka Rwoth.

³ Man ënē pidona both jö na ngölö köp i koma.

⁴ Wan ba etye kī twër mē cem ëka math?

⁵ Wan ba etye kī twēr mē mīō dhakō n'oye woth kōdwa, kamē ēkwēna nōkēnē ēka utmego ka Rwoth, ēka Kepa?

⁶ Onyo an ēka Baranaba kēkēn ēnē myero etii pī kwō?

⁷ Nga na tio kamē acikari, cē cakō cūlō ōcara mērē kēnē? Nga na pīdhō ōlōk ī pwodho mērē, na ba camō nyig ōlōk n'ōcēk kī iē? Nga na kwaō kwath na ba madhō cak n'ōya kī kom rom na ēn kwaō?

⁸ An atye ka twakō kōp nī ī kite ka dhanō kēkēn? Cīk kono ba kobo nī kōmanōn?

⁹ Pīēn ī Cīk ka Muca ēcōō nī, “Kūr itwe dhō thwōn ka tye ka nyōnō kal.” Obanga onwongo mōnō thama mērē ut ī kom thwoni?

¹⁰ Ēn ba okobo kōp nōn both onu? Ī adyer, kōp mērē yam ēcōō pī onu, pīēn apur myero opur nakun tye kī gen, ngat na pwodo bēl thon myero opwod nakun tye kī gen mē nwongo gin mōrō kī iē.

¹¹ Ka wan ēcwō kodhi mē tipo ī kinwu, manōn twērō bedo thwōn kōp mōrō na thwōnē ka wan ēkaō jami mōkō mē kom kī bothwu?

¹² Ka jō nōkēnē tye kī twērō mē kōny nōn kī bothwu, cē wan ba ēlōōgī ōkō kī twērō nōn?

Ēntō kadī bed nī twērō nōn tye bothwa, wan ba etio kōdē, wan ēdīō cwinywa ī kōp kībēc ēk kūr eketh orii mōrō na gēngō kobo kōp mē Emuth na Bēr ī kom Kiricito.

¹³ Un ba ingeo nī jō na tio ī ōt k'Obanga gīn nwongo cemgī kī ī ōt k'Obanga, ēka jō na tio gīnī ī kom keno tyēr epoko nīgī tyēr n'ētyērō?

¹⁴ Rwoth yam thon öcökö i kit yoo acël nön ni jö na titö köp më Emuth na Bër myero onwong gini gin mörö na gin kwö ködë pi titö köp më Emuth na Bër.

¹⁵ Ëntö an ba atio ki twërö ni mörö. Ëka an ba acöö köp ni ëk itim unu i koma ni kömanön. Bedo na bër ka athöö löö na dhanö mörö lökö wakërëna dökö gin mörö na ka cungo mërë ope.

¹⁶ Ka an atitö köp më Emuth na Bër, myero kür awakara ködë, piën ëdia adia ië. Ka ba atitö köp më Emuth na Bër, cë an abino nënö can.

¹⁷ Ka atimö man ki cwinya këna, abino nwongo cül, ëntö ka atimö nakun ba amitö, nwongo atye ka cobo tic n'ëmia.

¹⁸ An abino nwongo koth cül mënë? Cül na mëga ënë yom cwiny na an anwongo ki kom titö köp më Emuth na Bër, na ba angölö cül mörö ië both jö na winyo gini, nakun thon ba atio ki twërö na an aute ködë ëk anwong köny mörö ki both jö na an atitö nigü köp më Emuth na Bër.

¹⁹ Kadï bed ni alööra këna i nyim jö kibëc, ëntö dong atyeko mira më bedo opii ka jö kibëc, ëk anwong-gi na pol.

²⁰ Ka atye both Eyuda, abedo calö Ayuda ëk anwong Eyuda mökö. Both jö na tye i thë cik ka Muca an abedo thon na calö dhanö na tye i thë cik, (kadï bed an ba atye i thë cik), ëk anwong jö na tye i thë cik.

²¹ Both Erok n'ope i thë cik ka Muca an abedo na calö dhanö n'ope i thë cik, (nakun nwongo ba atye abonge cik k'Obanga, ëntö abedo i thë cik ka Kiricito), ëk anwong jö na ba tye i thë cik.

²² Both jö na görü gini i yeegi, an abedo na calö

dhanö na görü thon, ëk anwong jö na görü. An alübö kite kibëc na dhanö tye ködë, ëk ömïa alar jö mökö i yoo kibëc.

²³ Manön kibëc atio pï köp më Emuth na Bër, ëk an thon anywak gum mörö na yaa kï ië.

²⁴ Un ba ingeo unu nï jö na pyem kï ngwëc kibëc ngwëcö gïni, ëntö dhanö acël këkën ënë nwongo mïc më pwöc? Un thon ngwëc unu kömanön ëk inwong unu mïc më pwöc.

²⁵ Dhanö acëlacël na pyem i tuko myero ögwökërë kënë i yodhi kibëc. Gïn timö manön ëk enwong gïni tok më dheo na ba rii, ëntö onu ëtimö pï nwongo tok më dheo na rii naka naka.

²⁶ An gira angwëcö atir na ba acacapa, ba ad-hongo piny ata kamë ngat mörö na dhongo yamö nono.

²⁷ Ayelo koma, ëka amïö bedo opiina ëk ka dong atyeko titö köp both jö nökökënë, kür abed dhanö na ba ebino mïö mïc.

10

¹ Utmegona, amitö nï inge unu nï kwere onu kibëc yam obedo gïni i thë pöl, ëka gïn kibëc yam owok i dye nam.

² Gïn kibëc yam ebaticagï i pöl ëka i nam, ëk obed gïni jö ka Muca.

³ Gïn kibëc yam öcamö cem acël nön më tipo,

⁴ gïn kibëc omodho pii acël nön n'öya kï i lëla më tipo n'owotho ködgi, ëka lëla nön onwongo obedo Kiricito.

⁵ Kadi bed nï kömanön, Obanga onwongo cwinye ba yom i kom jö mökö ëka dong komgi n'öthöö onwongo ököth ata i thim.

⁶ Jami ni ötimëre na calö apor both onu, cïkö onu nï kür dök ebed parö gin na reco, na calö yam gïn öparö.

⁷ Kür ibed unu jö na wörö cal jwogi kite na jö mökö kï kin-gï ötimö ködë. Kite n'ëcöö ködë i Cöc na Leng nï, “Lwak obedo pïny i cem kï math, cë öya gïni malö më myël.”

⁸ Onu myero kür ëdöny i timö tim më ölyang, na calö jö mökö kï kin-gï yam ötimö ködë, ëka jö elip pyer ariö wie adek öthöö gïni ökö i nïnö acël.

⁹ Onu kür ëtëm Kiricito, na calö jö mökö yam ötimö ëka thwone onekogï.

¹⁰ Ëka kür ïngüngüta unu na calö jö mökö kï kin-gï yam öngüngüta gïni ködë, ëka malaika më thöö otyekogï ökö.

¹¹ Jami ni ötimëre bothgï na calö apor both onu. Ëcöö jami ni kibëc i Cöc na Leng më pwonyo onu jö n'ëkwö i karë ni më ajiki.

¹² Pï manön ëk ngat mörö na thamö nï ecung na tæk, ögwökërë ëk kür opodhi.

¹³ Atëmatëma mörö ope na maköwu na ba makö jö kibëc. Obanga genere, ëka ën ba bino yeo nï ëtëmwu rwök na löö ngö na un itwërö dangö. Ka ëtëmöwu, Obanga bino mïöwu yoo më bwöth ökö, ëk ibed unu kï tækö më dangö.

¹⁴ Pï manön, ewodha më amara, wëk unu wörö cal jwogi ökö.

¹⁵ An atwak kodwu na calö jö na ryëk, tham unu kenwu i köp na an atwakö.

¹⁶ Ekopo më gum na onu ëlëgö gum ië, ba obedo më güre më ribërë i remo ka Kiricito? Ogati na onu

epoko ië, ba obedo rîbërë i kom Kiricito?

¹⁷ Pîen ogati tye acël, onu n'epol ebedo kom acël, pîen onu kibëc ënywakö camö ogati acël nön.

¹⁸ Tham unu pî jö Icarael, jö na camö gin n'ëtyërö both Obanga ba rîbërë gîni më tic i keno tyër?

¹⁹ Ngö na an atye ka kobo? An atye ka kobo ni cem n'ëtyërö both cal jwogi obedo gin mörö, onyo ni cal jwök obedo gin mörö?

²⁰ Pe, ngö na an atye ka kobo ënë ni gin aryëda na jö na ba ngeo Obanga ryëdö gîni, gîni tyërö both cene, ëntö ba tyërö gîni both Obanga. An ba amitö ni irîbërë unu kî cene.

²¹ Ba itwërö unu madhö ekopo ka Rwoth ëka më cene. Ba itwërö unu cem i mëja ka Rwoth ëka dökî i mëja ka cene.

²² Onu ëmitö ni nyeko ömak cwiny Rwoth? Un ithamö ni onu ëtëk ëlöö ën?

Tii unu jami kibëc pî dheo k'Obanga

²³ “An atwërö timö jami kibëc,” ëntö manön ba nyutho ni jami kibëc könyö. “An atwërö timö jami kibëc,” ëntö manön ba nyutho ni jami kibëc döngö yee ka dhanö.

²⁴ Ngat mörö kür örang gin na könyö ën këkën, ëntö myero ölüb gin na könyö awodhe.

²⁵ Cam unu gin mörö këkën n'ëcadhö i cuk më ringo, abonge penyo gin mörö pî lworö thama më cwinywu.

²⁶ Pîen “lobo ëka jami kibëc na tye ië obedo më ka Rwoth.”

²⁷ Ka cë dhanö mörö na ba oye Kiricito ocwodowu icem, ëka imitö unu cidhö cem, cam unu

gin mörö kékén n'eketho i nyimwu abonge penyo gin mörö pi lworro thama më cwinywu.

²⁸ Ëntö ka ngat mörö okobo niwu ni, “Man ngö na dong ëtyërö ökö both cal jwök,” cë kür icam unu, pi parö ngat na dong okobo köp nön më po wiwu, ëka pi thama më cwinye na nyutho bal.

²⁹ Manön an akobo pi thama na tye i cwiny dhanö nökenë ca, pathi pi thama na ute i cwinyi. Pingö egengö twëröna na an atye ködë më timö gin mörö ni ökö, pi thama na tye i cwiny dhanö nökenë?

³⁰ Ka an acemo nakun apwöyö Obanga, pingö ëyanya pi gin na dong atyeko pwöyö Obanga ökö pïrë?

³¹ Dong ka icamö unu cem onyo imadhö unu math, onyo jami kibëc na un itio, tim unu kibëc më miö dheo both Obanga.

³² Kür ibal unu cwiny Eyuda, kadï thon jö Grecia, onyo jö k'Obanga n'oye Kiricito,

³³ kit na calö an atëmö yomo cwiny ngat acëlacël i gin na an atio kibëc. An ba arangö ngö na kõnya këna, ëntö arangö gin na kõnyö jö na pol, ëk ölarë ginï.

11

¹ Lüb unu kitena, na calö an thon alübö kite ka Kiricito.

Umo wic i caa më wörö Obanga

² Apwöyöwu piën i köp kibëc ipo unu pira, nakun ilübö unu pwonyana na yam amiö bothwu.

³ Ëntö amitö inge unu ni Kiricito ënë obedo wi ëcwö acëlacël, ëcwö ënë obedo wi dhakö mërë, ëka Obanga ënë obedo wi Kiricito.

⁴ Ēcwö mörö na lëgö, onyo na titö köp k'Obanga, nakun oumo wie, manön nwongo okelo lewic i wie.

⁵ Ēntö dhakö na lëgö, onyo na titö köp k'Obanga nakun ba oumo wie, nwongo okelo lewic i wie, piën ba tye apokapoka mörö i kin ën ki dhakö n'ölyëlö wie.

⁶ Ka dhakö mörö ba umo wie, myero ölyël yer wie ökö, ëka ka obedo më lewic ni dhakö ka ölyëlö wie, onyo önyarö yer wie anyara, ën myero dong oum wie.

⁷ Ēcwö kür myero oum wie, piën ën obedo cal k'Obanga ëka dheo k'Obanga. Ēntö dhakö ënë dheo k'ëcwö.

⁸ Piën ëcwö ba öya ki kom dhakö, ëntö dhakö ënë öya ki kom ëcwö.

⁹ Ēcwö onwongo ba ecweo pi dhakö, ëntö dhakö ënë ecweo pi ëcwö.

¹⁰ Pi tyën köp ni, ëka piën pi emalaika, dhakö myero oruk gin mörö më umo wie më nyutho ni etye i the twër ka cwörë.

¹¹ Ēntö i kin jö ka Rwoth, dhakö ba twërö cung kënë abonge ëcwö, ëka ëcwö ba twërö cung kënë abonge dhakö.

¹² Piën na calö dhakö öya ki kom ëcwö, i yoo acël nön, ëcwö thon dhakö ënë önywölö. Ēntö jami kibëc öya ki both Obanga.

¹³ Ngöl unu köp ni kenwu: Pore ni dhakö më lëga both Obanga na ba oumo wie?

¹⁴ Kite n'ënywölö onu ködë thon ba pwonyo onu ni ka ëcwö ömïö yer wie ölöth na boco ba miö ën lewic?

15 Ëntö ka dhakö tye kî yer wie n'ölöth na boco manön obedo më dheo mërë, piën ëmïö ën yer na boco nön ëk oumere ködë.

16 Ëntö ka ngat mörö mitö kelo pyem ië, wan epe kî kit na calö manön, ope thon i kin jö k'Obanga n'oye Kiricito.

Bal n'ödönyö i Cem ka Rwoth

17 An aciköwu nakun thon atye kî köp mökö na an ba abino pwöyöwu ië, piën cökërëwu gin mörö ope ië na bër, ëntö kelo bal kékën.

18 Köp më acël na an atyeko winyo ënë nî ka un icökërë kanya acël na calö jö n'oye Kiricito, apokapoka bedo tye i kinwu ëka an thon aye köp nön,

19 piën apokapoka myero obed tye i kinwu, ëk jö na genere onen gîni ökö kanya leng.

20 Ka icökërë unu kanya acël, nwongo ba obedo cem ka Rwoth ënë un icamö adyer,

21 piën ngat acëlacël cakö camö cem mërë ökö, nakun jö mökö kec nekogî, ëka jö mökö mër ökö.

22 Un ba itye unu kî peciwu, kanya un itwërö cem kî math ië? Onyo icaö unu jö k'Obanga n'oye Kiricito, nakun iketho unu lewic i kom jö na ba tye kî gin mörö? Ngö na myero akob bothwu? İmitö unu nî apwöwu? Ba abino pwöyöwu pi köp nî.

Cem ka Rwoth

23 Piën pwony na yam apwonyowu ködë, Rwoth ënë ömïa, nî, i kiwor nön n'eketho örörö i kome, Rwoth Yecu ökwanyö ogati,

24 ëka i karë na dong öpwöyö, opoko ië, ëka okobo nî, “Man ënë koma na tye pîrwu, tîm unu nî köman më po ködë pîra.”

25 Kömanön ka öcamö gini cem me kothyeno othum, ökwanyö ekopo ëka okobo ni, “Ekopo ni ënë cikëre na nyen i remona. Tim unu ni köman i karë kibëc na un imadhö, më po ködë pira.”

26 Pi karë kibëc na un icamö ogati ni, ëka thon ka imadhö unu ki i ekopo ni, nwongo itye unu ka titö köp më thöo ka Rwoth, naka ka ën bino dwogo.

27 Pi manön, ka dhanö mörö öcamö ogati ni, onyo ömadhö ki i ekopo ka Rwoth ni, nakun kite mërë ba opore, nwongo ën ödökö abal më pyëdö kom ki remo ka Rwoth.

28 Dhanö acëlacël myero kono öngirë kënë, na bara öcakö camö ogati ëka madhö ngö na ute i ekopo nön.

29 Piën ngat na camö onyo madhö nakun ba öniang na bër i kom ngö n'ecwodo ni kom Rwoth, nwongo ën tye ka kelo ngölö köp i kome kënë ka cë öcamö onyo ömadhö.

30 Manön ënë ömiö jö na pol ki kinwu görü ëka two gini, jö mökö thon öthöo gini ökö.

31 Ëntö ka onu ëtwëro ngölö köp i kom onu ki köp n'atir, onwongo ba ëngölö köp i kom onu.

32 Dong ka Rwoth ënë ngölö köp i kom onu, ën pwodo onu më pwonyo onu, ëk kür ëngöl köp ölöo onu kanya acël ki jö më lobo.

33 Pi manön dong, utmegona, ka un icökëre kanya acël më camö cem ka Rwoth onu, ngat acëlacël myero ökür awodhe.

34 Ka dhanö mörö kec oneko, myero ën kono ocem ki i pacö mërë, ëk köp kür ölööwu ka icökëre unu kanya acël. Köp nökenë n'odong an abino yübö ka an athuno bothwu.

12

Mic na Tipo Naleng miö

¹ Kobedi dong utmegona, köp i kom mic na Tipo Naleng miö, amitö ni inge unu na bër.

² Ingeo unu ni, i karë na un onwongo pod ibedo unu jö na ba ngeo Obanga, onwongo irwenyo unu ökö më wörö cal jwogi na ba twak.

³ Pi manön an amitö iniang unu ni ngat mörö ope na Tipo k'Obanga miö ën kobo ni, "Yecu ëlamö," ëka ngat mörö ope na twërö kobo ni, "Yecu ënë Rwoth," na path ka Tipo Naleng ënë miö ën kobo.

⁴ Mic tye na kothgi papath, ëntö Tipo acël nön ënë poko.

⁵ Tic tye na kothgi papath n'etio pi Rwoth, ëntö etio pi Rwoth acël nön.

⁶ Yodhi më tic tye na papath, ëntö Obanga acël nön ënë tio ki jii i yodhi kibëc.

⁷ Dhanö acëlacël ëmiö mic më Tipo më könyö jö nököënë.

⁸ Tipo Naleng miö dhanö acël köp më ryëkö, Tipo Naleng nön miö dhanö nököënë köp më ngec.

⁹ Tipo Naleng nön miö yee both dhanö nököënë, both dhanö nököënë, Tipo Naleng nön miö mic më cangö jii,

¹⁰ both dhanö nököënë ën miö mic më tio tango, both dhanö nököënë më twakö köp na calö ad-warpiny, both dhanö nököënë poko kin cwiny na papath, both dhanö nököënë dhümö lëb na papath, ëka both dhanö nököënë më gönyö lëb na papath.

¹¹ Ëntö Tipo Naleng nön ënë tio tic ki mic ni kibëc, ën poko mic na papath both dhanö acëlacël kite na ën mitö ködë.

Kom acël kī dul na papath

¹² Kom dhanö tye kī dul na pol na papath, ëntö dul na papath nön bedo dul kom acël. Ënë kom Kiricito.

¹³ Pïen onu kībēc, Eyuda ëka jö Grecia, opii ëka jö na löörë kën-gī, onu ebatica ëka ëdökö kom acël i Tipo acël nön, onu kībēc ënywakö Tipo acël nön.

¹⁴ Pïen kom dhanö ba tye ië dul acël kékën, ëntö tye ië dul na pol.

¹⁵ Ka onwongo tyën jö kob nī, “An ba abedo dul kom pïen an ba abedo cīng,” manön ba mïö ën kwërö më bedo dul kom.

¹⁶ Ka onwongo ith kob nī, “An ba abedo dul kom pïen an ba abedo wang,” manön ba mïö ën kwërö më bedo dul kom.

¹⁷ Ka onwongo kom kībēc obedo wang jö, onwongo ëtwërö winyo köp nīngö? Ka onwongo kom kībēc obedo ith jö, onwongo ëtwërö ngweno pīny nīngö?

¹⁸ Ëntö kite na tye ködë, Obanga oketho dul na papath i kom, dul acëlacël kite na ën mītö ködë.

¹⁹ Ka onwongo gīn kībēc obedo dul kom acël kékën, kom onwongo ba twërö bedo tye.

²⁰ Na calö tye ködë, dul kom tye na papath, ëntö kom tye acël.

²¹ Wang jö ba twërö kobo nī cīng jö nī, “An ba amiti!” Wic thon ba twërö kobo nī tyën jö nī, “An ba amiti!”

²² Nakaka manön, dul më kom mökö n'ëthamö nī görü ënë dōkī nwongo mītërë rwök,

²³ ëka dul kom mökö n'ëthamö nī dheogī ope ënë onu ëmïö wörö na pīrë tēk, ëka dul kom na ba nen na bër ënë eruko kī ruk na bër,

²⁴ nakun dul kom onu na nen na bër ba dök mütö gin mörö. Obanga örübö dul më kom nakun mïö dheo na thwönë na löö both dul na dheogï nök,

²⁵ ëk apokapoka kür obed tye i kom, ëntö ëk dul acëlacël ôpar pï dul kom awodhe.

²⁶ Ka dul kom mörö acël tye ka rem, dul kom nökënë thon rem kanya acël ködë. Ka ëwörö dul kom acël, dul kom na papath kibëc bedo kï yom cwiny ködë.

²⁷ Dong un kibëc ibedo unu kom Kiricito, ëka dhanö acëlacël kï kinwu obedo dul kom Kiricito.

²⁸ Obanga oketho jö ni i kin lwak jö n'oye Kiricito, më acël ëkwëna, më ariö edwarpïny, më adek epwonye, ëka jö na tio tango, ëka thon jö na tye kï mïc më cangö jïi, jö na twërö kõnyö jö nökënë, jö na tye kï mïc më tëla ëka jö na dhümö gïni lëb na papath.

²⁹ Jö kibëc obedo gïni ëkwëna? Jö kibëc obedo gïni edwarpïny? Jö kibëc obedo epwonye? Jö kibëc tio tango?

³⁰ Jö kibëc tye kï mïc më cangö jïi? Jö kibëc dhüm kï lëb na papath? Jö kibëc gönyö gïni lëb?

³¹ Keth unu cwinywu më nwongo mïc na pïrgi tæk.

Ëka dong an abino nyutho niwu yoo na bër na löö.

13

Mar

¹ Ka an adhüm kï lëb jö nökënë ëka më k'emalaika, nakun ba atye kï mar an abedo calö ölang na kok rwök onyo agece.

² Ka an atye kī mīc mē twakō kōp na calō adwarpīny nakun anīang mūng, ēka atye kī ngec kībēc, ēka ka an atye kī yee kībēc, na an arōmō kōbō kidi na thwōnē kany ōkēnē, nakun ba atye kī mar, an nwongo ba abedo gin mōrō.

³ Ka an amīō jami kībēc na an atye kōdē both ēcan, ēka ajalō thon koma mē awanga kī mac, nakun ba atye kī mar, ba bino kōnyōna kī gin mōrō.

⁴ Mar diō cwinye, obedo thon nyakīca, mar ba nyek, ba wakērē,

⁵ ba ger, ba rangō gin na makō kome kēnē, ba ngōō piōpiō, ba kanō gin na rac n'ētīmō ī kome.

⁶ Cwinye ba bedo na yom ī tīm na ba tye atīr, ēntō cwinye yom ī kōp na tye adyer.

⁷ Mar diō cwinye ī jami kībēc, yee kōp kībēc, tye kī gen ī karē kībēc, dangō kōp kībēc.

⁸ Mar ba jik. Dwaropīny bino thum ōkō, naka thon dhūmō lēb bino jik ōkō, ēka ngec bino jik thon ōkō.

⁹ Piēn onu engeo dul mōkō na nōnōk kēkēn, ēka edwaro thon dul na nōnōk,

¹⁰ ēntō ka gin n'opong obino, gin n'obedo dudul bino jik ōkō.

¹¹ Ī karē na an abedo athīn, atwak kamē athīn, ahamō thama kamē athīn ēka apyem kamē athīn. Kobedini na dong atengo, awēkō kite mē thino ōkō.

¹² Gin na onu ēnēnō ī caa ni, obedo calō cal na nen ribiribi kī ī kiyo, ēntō ī karē na bino anyim ca onu ebino nēnērē wang kī wang. Kobedini an angeo dul mōrō kēkēn, ēntō ī nīnō na bino anyim ca an abino bedo kī ngec kībēc, kadī bed engea na bēr.

¹³ Dong tye gin adek na bino bedo naka naka: yee, gen, ëka mar. Ëntö gin na pîrë tøk na löögî kibëc ënë mar.

14

Mïc më dhümö lëb na papath

¹ Yelere unu më nwongo mar, keth unu cwinywu thon më nwongo mïc më Tipo, na löö kibëc mïc më twakö köp na calö adwarpïny.

² Pïën dhanö na dhümö lëb na papath ba twak kî jïï ëntö nwongo ën tye ka twak k'Obanga. Ngat na nïang i köp mërë ope, nwongo ën tye ka kobo müng më Tipo Naleng.

³ Ëntö dhanö na twakö köp na calö adwarpïny, twak kî jïï nakun döngö yeegî, cükö cwinygî, ëka kweo cwinygî.

⁴ Dhanö na dhümö lëb na papath döngö yee mërë kënë, ëntö dhanö na twakö köp na calö adwarpïny nwongo tye ka döngö jö n'oye Kiricito.

⁵ An amïtö nï ïdhüm unu lëb na papath, ëntö na löö kibëc an amïtö nï itit unu köp k'Obanga. Dhanö na twakö köp na calö adwarpïny pîrë tøk löö ngat na dhümö lëb na papath, thwara ka ngat mörö ögönyö both jïï gin na ën kobo, ëk ököny jö n'oye Kiricito më döngö.

⁶ Utmegona, ka an abino bothwu nakun adhümö lëb na papath, köny ngö na an abino bedo ködë bothwu, ka ba an akelo niwu köp mörö n'Obanga onyutho nïna, onyo ngec mörö, onyo köp mörö na calö më k'adwarpïny, onyo pwony mörö?

⁷ Naka thon gin n'ope kî kwö, na kok na calö pelu onyo adungu, ka dwönë ba winyere na bër, jïï bino

nïang nïngö i wer n'etye ka küdhö onyo n'etye ka göönö?

⁸ Èka buruji, ka ba ëküdhö kî dwön më cwodo, nga na bino yübërë më cîdhö i lwëny?

⁹ I kite acël nön, nga na bino nïang i gin na un ikobo ka itye unu ka dhümö lëb na papath, nakun ikobo unu köp na ba ënïang ië? Köpwu bino këth i wi yamö ata.

¹⁰ Tye koth lëb na pol i wi lobo na gïn kibëc papath, ëntö ba tye mörö na tyën köp mërë ope.

¹¹ Ka an ba angeo lëb dhanö mörö na tye ka twakö, an abedo na calö arok bothe, ëka ën thon bedo na calö arok botha.

¹² Dong kömanön, un thon na calö iketho unu cwinywu më nwongo mïc më Tipo, tëm unu më löönö mïc na miö jö n'oye Kiricito döngö.

¹³ Pî manön, dhanö na tye ka dhümö lëb na papath ën myero ölëg both Obanga ëk ömüi ën mïc më gönyö ngö na ën etye ka kobo.

¹⁴ Piën ka an alëgö nakun adhümö lëb, cwinya lëgö, ëntö nwongo thamana ba timö gin mörö ië.

¹⁵ An atim ngö kobedini? An abino lëgö both Obanga kî cwinya nakun alëgö kî thamana thon. An abino wero wer kî cwinya nakun abino wero kî thamana thon.

¹⁶ Ka in ipwöyö Obanga kî cwinyi këkën, dhanö nökenë n'obino i gürëwu twërö kobo “Amën” nïngö i pwöcni i kite mënë nakun ba önïang i kom ngö na in ikobo?

¹⁷ Kadî onwongo imiö pwöc na bër, ba bino könyö dhanö nökenë ca më döngö kadî kicël mörö.

¹⁸ An apwöyö Obanga piën an adhümö lëb na papath na lööwu kibëc,

19 ëntö i gürë ka jö n'oye Kiricito an amitö kobo köp mörö abic këkën kî thamana më pwonyo kî jö nököënë, nakaka kobo köp elip apar nakun adhümö kî lëb na ba ngere.

20 Utmegona, kür ibed unu kamë ëthïnö i thamawu. Bed unu ëthïnö i timö gin mörö na rac, ëntö i thamawu bed unu jö n'otengo.

21 Yam ëcöö i Cîk nî,
 “An abino twak kî jö më rok ni kî lëb na jîi dhüm
 ködë na papath
 ëka kî dhö Erok.
 An abino twak both jö ni,
 ëntö kadî bed nî gîn ba bino winyona,”
 man köp ka Rwoth.

22 Manön nyutho nî dhümö lëb na papath ëmïö ëk obed anyuth both jö na ba oye Kiricito, pathî both jö n'oye, ëntö twakö köp na calö adwarpîny tye pî jö n'oye, pathî pî jö na ba oye.

23 Dong ka jö kibëc n'oye Kiricito ögürë kanya acël nakun jö kibëc dhümö lëb na papath, ëka jö nököënë na ba nîang, onyo jö na ba oye Kiricito obino ië, gîn ba bino kobo nî un ipo?

24 Ëntö ka jö kibëc tye ka twakö köp na calö adwarpîny, ëka dhanö mörö na ba oye Kiricito, onyo dhanö na ba nîang obino i cökërë, ën bino nîang i kom bal mërë pî gin na ën owinyo kî both jö kibëc. Köp na jîi kibëc okobo bino ngölö nîne köp.

25 Müng na tye i cwinye ebino kelo kanyalër, ëka bino ryebere pîny, wörö Obanga nakun tucu nî, “Adyer, Obanga tye i kinwu.”

Kite më wörö Obanga

26 Utmegona, ka igürë unu, dhanö acêlacêl tye kî wer, ngat nökenë pwonyo, ngat nökenë kobo ngö n'Obanga onyutho ninë, ngat acêl bino dhümö lëb na papath, ëka ngat nökenë bino gönyö ngö n'ekobo. Ëntö jami ni kibëc myero ötimërë i yoo na könyö döngö ka jö n'oye Kiricito.

27 Ka dhanö mörö dhümö lëb na papath, myero gîn obed jö ariö onyo jö adek, kür ökal wel nön, nakun eleo alea, ëka ngat mörö myero ögöny ngö na gîn kobo.

28 Ëntö ka ngat mörö ope na gönyö, myero ngat na mitö twak kî lëb na papath nön öling alinga i ka gürë ka jö n'oye Kiricito, myero ötwak ën kënë ëka both Obanga.

29 Edwarpïny myero obed jö ariö onyo jö adek, ëka jö nökenë pimo köp na gîn tye ka kobo.

30 Ka cë Obanga onyutho köp mörö both ngat mörö nökenë n'obedo pïny i kinwu, dhanö n'onwongo tye ka twak myero öling ökö.

31 Piën un kibëc itwërö twakö köp na calö adwarpïny nakun ileo unu alea, ëk jö kibëc opwonyere ëka dök thon öcük cwinygi.

32 Ngat na tye ka twakö köp na calö adwarpïny myero ölöö mïc mërë më twak,

33 piën Obanga ba obedo won arubaruba, ën obedo won kuc.

Na calö jö k'Obanga na leng kibëc n'oye Kiricito,

34 mon myero öling alinga ka tye gîn i kin jö n'oye Kiricito. Ba eyeo nigî më twak, ëntö gîn myero ömirë i thë löc kite na Cîk kobo ködë.

35 Ka cë gîn mitö ngeno köp mörö, myero gîn openy cwögi kî pacö. Obedo lewic rwök both dhakö më twak i ka gürë ka jö n'oye Kiricito.

³⁶ Onyo ïthamö unu nï köp k'Obanga yam öcakëre kï bothwu, ëka dökï obino bothwu këkën?

³⁷ Ka ngat mörö thamö nï ën ebedo adwarpïny onyo etye kï mïc mökö më Tipo, myero ën ongee nï köp na an acöö bothwu ënë cïk n'öya kï both Rwoth.

³⁸ Ëntö ka ngat mörö ba oketho köp nï ï thama, ën thon ba ebino ketho thama ï kome.

³⁹ Dong utmegona, keth unu cwinywu më twakö köp na calö adwarpïny, ëntö dhümö lëb na papath thon kür ijük unu.

⁴⁰ Ëntö gin mörö kibëc myero ëtim ï kite na bër, körë kï körë.

15

Cer ka Kiricito

¹ Kobedi dong utmegona, an amitö poono wiwu ï kom köp më Emuth na Bër na yam atitö bothwu, na un dong igamö ökö, ëka thon icung unu ië.

² Pï köp më Emuth na Bër nï ënë ömïö ïlarë unu, ka dong imakö unu na tæk köp na yam atitö bothwu, kono onwongo ba iyee unu nono.

³ Pï köp na an amïöwu na pïrë dit më acël, na an thon agamö kobo nï—Kiricito yam öthöö pï bal onu, nakun lübö Cöc na Leng na yam ëcöö.

⁴ Eiko ën, ëka ecero ën ökö ï nïnö më adek, nakun lübö Cöc na Leng na yam ëcöö.

⁵ Ën onen both Kepa, cë onen both ëkwëna apar arïö.

⁶ Kinge manön onen both utmego na löö mia abic wang acël, pol jö mökö kï kom jö nön pod tye gïni na kwö, kadï bed nï jö mökö öthöö gïni dong ökö.

⁷ Cē ēn onen dōkī both Yakobo, ēka both ēkwēna kībēc,

⁸ cē ī ajiki mērē kībēc onen botha thon, kadī bed nī an abedo calō ngat mōrō n'ēnywölō ī karē na ba opore.

⁹ Pīēn an atīdī rwök kī kin ēkwēna kībēc, n'onwongo ba apora nī ēk ecwoda nī akwēna, pīēn yam ayelo jō k'Obanga n'oye Kiricito.

¹⁰ Ēntō pī kīca k'Obanga n'ōmīa, ēnē ōmīō an atye kite na an aute kōdē, ēka kīca mērē na ēn ōmīa onwongo ba obedo mē nono. An atio tic na tēk rwök na lōō jō nōn kībēc, kadī bed nī pathī an, ēntō kīca k'Obanga ēnē otio kōda.

¹¹ Adyer kadī bed onwongo nī an onyo gīn, kōp na wan dong ētītō, ēnē kōp na un iyee.

Cer ka jō n'ōthōō

¹² Kobedi dong ka ētītō nī ecero Kiricito kī kin jō n'ōthōō, pīngō jō mōkō kī kinwu kobo nī cer ka jō n'ōthōō ope?

¹³ Ēntō ka cer ka jō n'ōthōō ope, cē Kiricito thon ba ecero.

¹⁴ Ēka ka Kiricito ba ecero, cē tītō kōpwa bedo na kōny mērē ope, naka thon yeewu kōny mērē ope.

¹⁵ Mēd ī kom manōn, onu thon ebledo ecaden mē twodo ī kom Obanga, pīēn onu ētwakō kōp ī kom Obanga nī ēnē ōmīō Kiricito ocer kī ī thōō. Ēntō ka tye adyer nī jō n'ōthōō ba eceroģī, cē Obanga ba ocero Kiricito.

¹⁶ Ka cero jō n'ōthōō ope, cē nwongo Kiricito thon yam ba ecero.

¹⁷ Ka Kiricito yam ba ecero, cē yeewu kōny mērē ope thon, nwongo pod itye unu ī thē bal.

18 Cë jö na dong öthöö gini na yee i Kiricito nwongo orwenyo gini ökö.

19 Ka genwa i Kiricito könyöwa i kwö më karë ni këkën, cë nwongo ënënö onu ki kica rwök na löö jö kibëc.

20 Ëntö i adyer mërë, Kiricito ecero dong ökö ki i kin jö n'öthöö, ën tye na calö wi kac ka jö n'öthöö.

21 Piën dhanö ënë okelo thöo, dök thon cer ka jö n'öthöö dhanö ënë okelo.

22 Kite na jö kibëc thöo ködë i Adam, kömanön thon jö kibëc ebino miögi kwö i Kiricito.

23 Ëntö ngat acëlacël ki kakarë, më acël Kiricito, na ënë wi kac, ëka kinge jö ka Kiricito i karë më dwogo mërë.

24 Cë ajiki piny dong bino thuno, na Kiricito bino miö ker i cing Obanga Apap, na nwongo dong otyeko türö kit löc kibëc, twërö kibëc ëka tükö.

25 Piën Kiricito myero obed i löc naka wang n'Obanga oketho lang mërë kibëc i thë tyënë.

26 Langö n'ebino tyeko më ajiki ënë thöo.

27 Piën yam ecöö ni, "Obanga oketho jami kibëc i thë tyënë." Ëntö ka ekobo ni oketho "jami kibëc" i thë löc mërë, cë nen kanyalër ni ba ëkwanö ën Obanga kikome n'oketho jami kibëc i thë löc ka Kiricito.

28 Ka dong etyeko ketho jami kibëc i thë löc mërë, ën Wod kikome thon ebino ketho i thë löc k'Obanga ëk Obanga öcök jami kibëc i thë löc mërë.

29 Kobedi dong, ka cer ka jö n'öthöö ope, jö na dong ebaticagi pi jö n'öthöö bino gini timö ngö? Ka cer ka jö n'öthöö ope kadï thon kicël, pingö dong ebatica dhanö na kakargi?

³⁰ Pīngö onu dong ebedo kanya rac caa kibēc?

³¹ An athöö nīn kibēc, utmegona, manön akobo bothwu atir, pī wakērē na an atye ködē i Kiricito Yecu Rwoth onu.

³² Kadī bed yam alwēnyö kī leeni na ger i Epeco, kite na dhanö kobo nī, kit kõny mēnē n'anwongo iē? Dong ka cer ka jö n'öthöö ope,

“Eru ecemu ēka emedhu,
piēn diki onu ebino thöö ökö.”

³³ Kür imīi ēbwölwu: “Woth kī jö na reco balö kite na bēcö.”

³⁴ Dwog unu cen i tham n'atir ēka ikwēr unu bal ökö. Piēn jö mökö ba tye gīnī kī ngec nön i kom Obanga. Akobo man ek lewic ömakwu.

Kit kom na dhanö bino cer ködē

³⁵ Gwök onyo ngat mörö bino penyo nī, “Jö n'öthöö ebino cerogī nīngö? Kit kom mēnē na gīn bino bedo ködē?”

³⁶ In imīng! Kodhi na in icwö i ngöm, ba twērö nwongo kwö wang n'öthöö kono.

³⁷ Ēka gin na in icwö ēnē kodhi nono, onyo kodhi kal onyo koth kodhi na path na ba obedo kom gin na donyo.

³⁸ Ēntö Obanga mīö kom i kodhi nön kite na yam ēn öyērö ködē, kodhi acēlacēl kī kit kothe.

³⁹ Ringo kom gin na kwö kibēc ba röm: Ringo dhanö path, ringo leeni path, ringo wīny path ēka mē rēc thon path.

⁴⁰ Dök thon kom mē polo ēka mē lobo tye, ēntö kom mē polo tye kī dheo mērē na path, ēka kom mē lobo thon tye kī dheo mērē na path.

⁴¹ Ceng tye kī koth dheo mērē acël, dwe thon tye kī dheo mērē na path, cēr thon tye gīnī kī dheogī na path, ěka cēr thon kitegī papath kī dheo na gīn miō.

⁴² Obedo thon nī kōmanōn ī kom cer ka jō n'ōthōō. Gin ěcwō obedo gin na thōō, ěntō ka ecero ba dōk thōō.

⁴³ ěcwō na nwongo ope kī dheo mērē, ěntō ecero na nwongo dheo mērē dong tye, ěcwō na nwongo pod gōrū, ěntō ecero na nwongo tye kī tēkō.

⁴⁴ ěcwō na nwongo obedo kom mē lobo ni, ěka ecero ěn na nwongo obedo kom mē cwiny.

Ka kom mē lobo ni ute, cē nyutho nī kom mē cwiny thon ute.

⁴⁵ Cōc na Leng kobo nī onu nī, “Dhanō mē acël obedo Adam n'ōdōkō dhanō na kwō.” ěntō Adam mē ajiki ōdōkō tipo na miō kwō.

⁴⁶ ěntō kom mē tipo ba ōcakō bino ěntō kom mē lobo ni ěnē ōcakō bino, cē dong kom mē tipo bino kī kōrē.

⁴⁷ Dhanō mē acël ecweo kī kom apua mē lobo, ěntō dhanō mē ariō na ěnē Kiricito ōya kī ī polo.

⁴⁸ Jō mē lobo cal gīnī kī dhanō n'ecweo kī kom ngōm mē lobo, ěka jō mē polo cal gīnī kī dhanō n'ōya kī ī polo.

⁴⁹ Dong kite na yam onu eruko cal ka dhanō n'ecweo kī ngōm mē lobo ni, kōmanōn thon onu ebino ruko cal ka dhanō n'ōya kī ī polo.

⁵⁰ Man ěnē ngō na an akobo bothwu, utmegona, nī gin na tye kī ringo kom ěka remo ba twērō leeno ker k'Obanga. ěka gin na tōp ōkō thon ba twērō leeno gin mōrō na ba tōp.

⁵¹ Winy unu müng nī: Pathī nī onu kibēc ebino thöo, ëntö ebino lökö onu kibēc ökö—

⁵² piöpiö pi karë na nönök mörö kékën, na calö wang na ryapi ëka ka buruji më ajiki bino kok, piën buruji bino kok, ëka dong ebino cero jö n'öthöö ökö na ba dök bino gini thöo, cë ebino lökö onu thon.

⁵³ Pi kom na töp myero orukere ki gin na ba töp, ëka gin na thöo myero orukere ki gin na ba thöo.

⁵⁴ Dong ka gin na töp orukere ki gin na ba töp, ëka gin na thöo thon orukere ki gin na ba thöo, cë bino nyutho köp na yam ecöö nī bino cobere kakarë nī, “Thöo dong ëmwönyö ökö i löc.”

⁵⁵ “In, thöo, löcni tye kwene?

In, thöo, kwirni tye kwene?”

⁵⁶ Kwir ka thöo ënë bal, ëka tükö më bal ënë cik.

⁵⁷ Ëntö pwöc myero obed both Obanga na mīo onu löc pi Rwoth onu Yecu Kiricito.

⁵⁸ Pi manön, utmegona më amara, cung unu na tük abonge gin mörö na yengowu, mëdërë unu thon ki tic ka Rwoth ninö kibēc, nakun iniang unu nī i Rwoth onu, yelerewu pathī më nono.

16

Mic më könyö jö k'Obanga

¹ Dong na makö köp më jwoko lim më könyö jö k'Obanga na leng, kite na calö acikö jö n'oye Kiricito na tye i Galatia, un thon myero itim unu nī kömanön.

² I ninö më acël kibēc më cabit, dhanö acëlacël ki kinwu myero opok lim mökö oketh path, nakun

lübö kite na ən onwongo ködë. Kür dök ikūra unu naka ka an athuno kunön ëka icak unu ajwok.

³ Ëka ka an athuno bothwu, an abino mïö waraga më nyuthere both jö na un iyërö ëka më orogï kï mïc na mewu yo Jerucalem.

⁴ Ëka ka pore nïna më cïdhö, cë gïn twërö woth köda.

Köp ka Paulo më ajiki

⁵ An abino limöwu kinge wok kï Macedonia, piën an atye ka yübö më wok kï i Macedonia.

⁶ I karë mökö gwök onyo an abino bedo bothwu pï karë mörö onyo an abino bedo kunön pï karë më cwïr, ëk ikönya unu i wothna kanya an abino cïdhö ië.

⁷ An ba amïtö nï anënwu kobedini, ageno nï an abino bedo bothwu pï karë mörö, ka Rwoth oyeo.

⁸ Ëntö an abino bedo i Epeco naka i nïnö më Pentekot.

⁹ Dholokek na lac më tic etyeko yabö ökö nïna, kadï bed nï jö na pol tye ka pyem köda.

¹⁰ Ka Timoteo obino, nën unu nï ba obedo kï lworö mörö i karë na ən tye i kinwu. Piën ən tye ka tio tic ka Rwoth, kite na an atye ka tic ködë.

¹¹ Ngat mörö kür ökwër ən, ëntö köny unu ən, ëk owoth kï kuc ka ən tye ka dwogo botha. An atye ka kürö ən më dwogo botha kanya acël kï utmego.

¹² Kobedi dong köp i kom ömïn onu Apolo, an akwaö ən më bino limöwu kanya acël kï utmego nököne, ëntö ən onwongo ba mïtö bino i karë nön, cë bino bino ka karë na bër onwongere.

Köp më ajiki

¹³ Bed unu na wangwu thwolo, cung unu na tēk i kom yeewu, bed unu cwö na cwinygi tēk, cung na tēk.

¹⁴ Tīm unu jami kibēc ki mar.

¹⁵ Ingeo unu ni Citipwanu ēka jö mē ödē enē öcakö gini dökö jö n'oye mē acēl i lobo Akaya, dök thon öjaläre gini kēn-gi mē tic pi jö k'Obanga na leng. Dong akwaöwu utmegona,

¹⁶ mē bedo ki winy bothgi ēka ki jö nökenē kibēc na yelere gini mē tic kanya acēl ködgi.

¹⁷ Cwinya onwongo yom i karē na Citipwanu, Porotunatuc ēka Akaika othuno gini, piēn gin obedo ka mīö köny n'onwongo un ipe kany mē mīö.

¹⁸ Gin dong okweo cwinya ēka cwinywu thon. Myero imii unu pwöc both koth jö na calö man.

Moth mē ajiki

¹⁹ Jö n'oye Kiricito na tye gini i lobo Acia omothowu. Akwila ēka Piricila omothowu gini ki cwinygi kibēc i Rwoth, kanya acēl ki jö n'oye Kiricito na cökäre gini i ödgi.

²⁰ Utmego kibēc omothowu. Mothere unu ki moth mē mar.

²¹ An, Paulo, acöö moth ni ki cinga kikokome.

²² Ka ngat mörö ba marö Rwoth, cen myero ömakī. Rwothwa, bin!

²³ Kica ka Rwothwa Yecu obed kodwu.

²⁴ Mar na mēga obed bothwu kibēc i Kiricito Yecu. Amēn.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc. and SIL Uganda

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 19 Dec 2025 from source files dated 2 Jul 2025

61e7f4da-dc0f-50a1-9dae-64ee1b392d80